

95. Deinde diserta singularum Deitatis personarum denominatio à Regio Psalte exprimebatur Psalmo. 33, 6. VERBO (quo Filium DEI notari, testis est Iohannes. cap. 1, 1.) IEHOVAE (patris) coeli firmati sunt, & SPIRITUS oris eius, omnis exercitus eorum.

96. Tum trina eiusdem verbi de DEO iteratio, pluralitatis imò Trinitatis Personarum in divinis, certum erat iudicium. Quo pertinebat consueta illa populi benedictio, in quâ ter nomen DEI reperebatur: Num. 6, 26. Item τριτάτων illud, Ies: 6, 3. Apoc. 4, 8.

97. Tandem quoties nomen Iehovah, quod est Essentiale DEI, diversis numero in Prophetarum vaticiniis tribuebatur: mox de mysterio Trinitatis p̄ admonebantur: ut cum audiebant promitti à Iehovah, missionem talis Regis, cuius nomen sit futurum, Iehovah Iustitia nostra: Ier. 23, 6. & 33, 16.: ibi mox colligebant, cum & mittenti & misso nomen Iehovæ assignetur: plures credendas esse personas in divinis: Quamquam hanc notitiam in vetere Testamento obscuriorem fuisse, minimè negamus.

98. Iam verò in Novo Testamento, Mysterium hoc Trinitatis sic est revelatum, ut nulla planè amplius dubitatio de eo in piorum animis sit reliqua. Hoc enim ad oculum demonstrat Incarnatio secundæ personæ Divinitatis, quæ obumbratione altissi-

Luc. 1, 35